

**MALAYSIA**

**DEWAN RAKYAT**

**ATURAN URUSAN MESYUARAT**

**NASKHAH SAHIH/BAHASA MALAYSIA**

<http://www.parlimen.gov.my>

**HARI KHAMIS, 29 OKTOBER 2015, PUKUL 10.00 PAGI**

**Bil. 45**

---

**PERTANYAAN-PERTANYAAN BAGI JAWAB LISAN**

1. PR-1333-L70536  
**Puan Hajah Normala binti Abdul Samad [ Pasir Gudang ]** minta **MENTERI DALAM NEGERI** menyatakan punca berlakunya pencetakan bahan bacaan kanak-kanak yang boleh menyebabkan pemesongan akidah sedangkan bahan bacaan tersebut sepatutnya telah ditapis oleh Jabatan Penerbitan Nasional dan apakah tindakan yang diambil bagi memastikan perkara sebegini tidak berlaku lagi.
2. PR-1333-L70002  
**Tuan Er Teck Hwa [ Bakri ]** minta **PERDANA MENTERI** menyatakan menyenaraikan jenis, keupayaan, lokasi "*Coastal Surveillance Radar*" yang terdapat di kawasan ESSZONE. Berapakah bot dan kapal yang telah dibeli dan beroperasi di kawasan terbabit. Senaraikan bilangan tindakan, operasi dan siasatan yang telah dijalankan sehingga kini.
3. PR-1333-L70846  
**Dato' Hasan bin Arifin [ Rompin ]** minta **MENTERI SAINS, TEKNOLOGI DAN INOVASI** menyatakan negara menghadapi masalah '*premature industrialization*' yang bertukar cepat kepada '*service industry*' yang mempunyai '*value added*' yang rendah dan '*manufacture sector*' tetap tidak bertukar kepada berteknologi tinggi di mana mempunyai '*export value added*' yang rendah. Oleh itu, peruntukan R&D perlu diperbesarkan. Berapakah peruntukan R&D oleh Kerajaan tahun 2013, 2014 dan 2015.
4. PR-1333-L70092  
**Dato' Mansor bin Othman [ Nibong Tebal ]** minta **MENTERI PERDAGANGAN DALAM NEGERI, KOPERASI DAN KEPENGUNAAN** menyatakan implikasi-implikasi kewangan kepada Kerajaan semenjak program Kedai Rakyat 1Malaysia dilaksanakan di seluruh negara dan apakah pulangan-pulangan ekonomi yang dinikmati oleh penduduk-penduduk setempat hasil pelaksanaan program ini.

5. PR-1333-L69848  
**Dato' Othman bin Aziz [ Jerlun ]** minta **MENTERI PENDIDIKAN** menyatakan sejauh manakah sasaran yang telah diletakkan oleh Kementerian terhadap Sekolah Sukan di negara ini telah tercapai bagi melahirkan golongan atlet muda sebagai pelapis wira sukan negara dan apakah kejayaan-kejayaan yang telah dicapai oleh pelajar menepati pelan jangka panjang Dasar Sukan Negara dan apakah Kementerian bercadang untuk menambah bilangan Sekolah Sukan di masa hadapan.
6. PR-1333-L71342  
**Dr. Mohd Hatta bin Md. Ramli [ Kuala Krai ]** minta **MENTERI PEMBANGUNAN WANITA, KELUARGA DAN MASYARAKAT** menyatakan apakah tindakan yang dibuat bagi mencegah kegiatan mengemis dan meminta derma di restoran dan kaki lima bank terutama bandar-bandar yang semakin menular sekarang terutama yang melibatkan sekolah tahfiz dan madrasah agama.
7. PR-1333-L71247  
**Dato' Seri Tiong King Sing [ Bintulu ]** minta **MENTERI KEWANGAN** menyatakan :-
  - (a) bilangan, nama dan negara asal institusi kewangan asing yang beroperasi di negara ini; dan
  - (b) apakah garis panduan dan pertimbangan Kerajaan dalam meluluskan institusi kewangan asing di negara ini.
8. PR-1333-L71474  
**Tuan Fong Kui Lun [ Bukit Bintang ]** minta **MENTERI WILAYAH PERSEKUTUAN** menyatakan sebab-sebab DBKL masih gagal memulihkan projek terbengkalai yang masyhur iaitu Plaza Rakyat hingga kini dan masihkah ada harapan projek tersebut dipulihkan dalam tempoh terdekat.
9. PR-1333-L70502  
**Datuk William @ Nyallau anak Badak [ Lubok Antu ]** minta **MENTERI KEMAJUAN LUAR BANDAR DAN WILAYAH** menyatakan adakah kerajaan akan memberi peruntukan tambahan untuk menaik taraf jalan Ulu Skrang yang belum lagi dapat dilalui oleh kenderaan.
10. PR-1333-L70967  
**Dr. Ong Kian Ming [ Serdang ]** minta **MENTERI KESIHATAN** menyatakan sama ada Kerajaan merancang untuk membuat vaksin pneumokokal mandatori memandangkan ia sudah wajib di lebih daripada 50 negara-negara membangun dan berada dalam senarai ubat-ubatan penting oleh Pertubuhan Kesihatan Sedunia (WHO).

11. PR-1333-L69682  
**Datuk Hajah Norah binti Abd Rahman [ Tanjong Manis ]** minta **PERDANA MENTERI** menyatakan apakah teknologi yang akan digunakan oleh Malaysia untuk membangunkan projek kereta api berkelajuan tinggi (*high speed rail/HSR*) antara Kuala Lumpur dan Singapura dan adakah bentuk model pembangunan projek tersebut dengan pihak Kerajaan Malaysia (sebagai contoh sama ada secara PFI, kerjasama, *turnkey* atau *design & build*).
12. PR-1333-L71463  
**Tuan Sim Chee Keong [ Bukit Mertajam ]** minta **MENTERI SUMBER MANUSIA** menyatakan berapakah jumlah mahasiswa yang menganggur mengikut pecahan gender, negeri, kaum, jurusan pengajian dan tahap pengajian tertinggi.
13. PR-1333-L71352  
**Dato' Sri Hasan bin Malek [ Kuala Pilah ]** minta **PERDANA MENTERI** menyatakan kaedah berkesan untuk memastikan Penjawat Awam mempunyai pengetahuan jitu mengenai INTEGRITI dan PATRIOTISME dalam melaksanakan tugas dan tanggungjawab mereka terhadap Kerajaan yang memerintah. Apakah kursus-kursus yang telah disusun atau dirancang serta kekerapan penjawat berkursus.
14. PR-1333-L71449  
**Dr. Hajah Siti Mariah binti Mahmud [ Kota Raja ]** minta **MENTERI SUMBER MANUSIA** menyatakan berapakah jumlah kes di mana majikan tidak mematuhi perintah mahkamah buruh (seperti tidak membayar pampasan kepada pekerja) dan apakah tindakan Kementerian terhadap majikan-majikan tersebut untuk jangka masa 10 tahun yang lalu.
15. PR-1333-L70733  
**Datuk Noor Ehsanuddin bin Mohd Harun Narrashid [ Kota Tinggi ]** minta **MENTERI KESIHATAN** menyatakan adakah Kementerian bercadang untuk melaksanakan "*psychiatric assessment*" atau "*psychological screening*" khusus kepada petugas-petugas perubatan seperti doktor, jururawat dan sebagainya untuk mengatasi stres atau kemurungan akibat kesibukan di tempat kerja.
16. PR-1333-L69922  
**Puan Alice Lau Kiong Yieng [ Lanang ]** minta **PERDANA MENTERI** menyatakan :-
  - (a) kesan sasaran Wawasan 2020 akibat kejatuhan harga minyak dunia dan nilai Ringgit Malaysia yang semakin serius dan apakah langkah Kerajaan bagi memastikan segala perancangan sebelum ini berjaya; dan
  - (b) kesan terhadap pembangunan negeri Sabah dan Sarawak akibat kemerosotan nilai ringgit dan penurunan harga minyak.

17. PR-1333-L70376  
**Tan Sri Datuk Seri Panglima Joseph Pairin Kitingan [ Keningau ]** minta **MENTERI KOMUNIKASI DAN MULTIMEDIA** menyatakan sama ada Kementerian sedar bahawa separuh daripada sekolah di pedalaman Keningau masih lagi menghadapi masalah talian akses internet kerana implikasinya ialah bahawa konsep Sekolah Abad Ke-21 tidak dapat direalisasikan.
18. PR-1333-L70351  
**Tuan Gooi Hsiao-Leung [ Alor Setar ]** minta **MENTERI PENDIDIKAN** menyatakan sama ada Kerajaan Persekutuan akan mengikut keputusan kerajaan Sarawak untuk mengiktirafkan "*United Examination Certificate*" (UEC), bagi seluruh negara, dan jika ya, bila ia akan dilaksanakan.
19. PR-1333-L69673  
**Datuk Juslie bin Ajirol [ Libaran ]** minta **MENTERI DALAM NEGERI** menyatakan penambahan jawatan pegawai Jabatan Imigresen yang diluluskan untuk negeri Sabah bagi tujuan penguatkuasaan memandangkan negeri ini mempunyai banyak pintu masuk negara.
20. PR-1333-L70281  
**Dato' Fauzi bin Abdul Rahman [ Indera Mahkota ]** minta **MENTERI DALAM NEGERI** menyatakan apakah usaha-usaha Kementerian untuk meningkatkan profesionalisme dan integriti pasukan polis agar kembali kepada reputasi polis negara kita pada suatu masa dahulu sebagai antara yang terbaik di rantau ini, malahan setanding dengan pasukan polis negara-negara maju. Apakah perancangan untuk meningkatkan lagi "*Police Intelligence*" kita.
21. PR-1333-L70379  
**Dato' Haji Abdul Rahman bin Haji Mohamad [ Lipis ]** minta **MENTERI SUMBER ASLI DAN ALAM SEKITAR** menyatakan tindakan Kementerian dalam menangani masalah hakisan pesisir pantai yang kini semakin serius yang telah dianggarkan melebihi 45% daripada pesisir pantai negeri Johor dan adakah kajian impak hakisan terhadap hutan paya bakau telah dilakukan dan apakah program mitigasi yang telah dilakukan.
22. PR-1333-L69629  
**Puan Hajah Zuraida binti Kamaruddin [ Ampang ]** minta **MENTERI KEMAJUAN LUAR BANDAR DAN WILAYAH** menyatakan jumlah peruntukan dan jumlah perbelanjaan sehingga kini bagi anak-anak Orang Asli di Malaysia.
23. PR-1333-L69534  
**Datuk Jumat bin Idris [ Sepanggar ]** minta **MENTERI DALAM NEGERI** menyatakan :-
  - (a) apakah status tindakan Jawatankuasa Khas yang ditubuhkan bagi menangani masalah IC palsu di negeri Sabah pada hari ini. Apakah perancangan yang telah direncanakan dan apakah tindakan yang telah diambil; dan

- (b) apakah langkah-langkah yang diambil oleh Kerajaan untuk memastikan perkara seperti ini tidak lagi berlaku di masa hadapan.
24. PR-1333-L70102  
**Tuan Nik Mohamad Abduh bin Nik Abdul Aziz [ Pasir Mas ]** minta **MENTERI DALAM NEGERI** menyatakan statistik kadar jenayah mengikut kategori umur setiap tahun sejak 2010.
25. PR-1333-L69556  
**Datuk Raime bin Unggi [ Tenom ]** minta **MENTERI DALAM NEGERI** menyatakan apakah bentuk tindakan tegas oleh Kerajaan terhadap penganjur dan peserta perhimpunan haram BERSIH 4.0 yang secara terang-terangan berbaur perkauman dan hasutan.
26. PR-1333-L70309  
**Dr. Tan Seng Giaw [ Kepong ]** minta **PERDANA MENTERI** menyatakan semua persiapan dan bilangan tender untuk projek insinerator di Taman Beringin, Jinjang Utara Kepong.
27. PR-1333-L69869  
**Datuk Seri Panglima Haji Abdul Ghapur bin Haji Salleh [ Kalabakan ]** minta **MENTERI PENDIDIKAN** menyatakan :-
- (a) adakah Kementerian maklum bahawa banyak rumah-rumah guru di negeri Sabah yang berada dalam keadaan daif sekali; dan
- (b) jika maklum mengapakah ini masih berlaku dan apakah tindakan Kementerian untuk memastikan semua rumah-rumah guru di Sabah setaraf dengan yang ada di Semenanjung.
28. PR-1333-L70535  
**Tuan Sim Tze Tzin [ Bayan Baru ]** minta **MENTERI SUMBER ASLI DAN ALAM SEKITAR** menyatakan senaraikan syarikat Malaysia yang terlibat dalam menyebabkan jerebu yang berasal dari Indonesia. Apakah tindakan pihak kerajaan Indonesia dan Malaysia terhadap syarikat-syarikat tersebut.
29. PR-1333-L71209  
**Tuan Haji Ahmad Lai bin Bujang [ Sibuti ]** minta **MENTERI PERTAHANAN** menyatakan apakah langkah yang dapat dilakukan dengan segera oleh pihak Kementerian untuk membaiki jalan Projek Jiwa Murni di Sarawak seperti yang terdapat di Saeh, Parlimen Sibuti yang rosak teruk dan menjejaskan kehidupan seharian rakyat serta merbahaya kepada kenderaan kecil. Adakah pihak JKR akan menyelesaikan masalah tersebut dan apakah langkah drastik yang telah dibuat.

30. PR-1333-L70148  
**Tuan Wan Hasan bin Mohd Ramli [ Dungun ]** minta **MENTERI KEWANGAN** menyatakan berapakah jumlah pinjaman KWSP kepada GLC dan bayaran balik GLC kepada KWSP serta senaraikan syarikat GLC yang menerima modal daripada KWSP.
31. PR-1333-L71082  
**Tuan V. Sivakumar [ Batu Gajah ]** minta **MENTERI DALAM NEGERI** menyatakan kesahihan dan keperluan untuk membawa masuk 1.5 juta pekerja asing dari Bangladesh. Apakah nasib buruh-buruh tempatan akibat daripada kemasukan buruh asing dengan begitu ramai yang boleh menggugat dan menjejaskan keseimbangan pasaran buruh dalam negara.
32. PR-1333-L71301  
**Dato' Noraini binti Ahmad [ Parit Sulong ]** minta **MENTERI SUMBER ASLI DAN ALAM SEKITAR** menyatakan mengenai keperluan menandatangani Memorandum Persefahaman (MoU) bilateral mengenai Pencemaran Jerebu Rentas Sempadan antara Malaysia dan Indonesia yang diumumkan baru-baru ini apabila Perjanjian ASEAN mengenai Pencemaran Jerebu Rentas Sempadan telah pun diratifikasi oleh semua negara ASEAN.
33. PR-1333-L70785  
**Datuk Aaron Ago anak Dagang [ Kanowit ]** minta **MENTERI KEMAJUAN LUAR BANDAR DAN WILAYAH** menyatakan anggaran kos, tempoh dan baki jalan luar bandar (KM) yang perlu dibina supaya semua rakyat di luar bandar Sarawak dan Sabah dapat "*connectivity*" jalan raya sepenuhnya.
34. PR-1333-L70984  
**Dato' Ir. Haji Nawawi bin Ahmad [ Langkawi ]** minta **MENTERI KEWANGAN** menyatakan berapakah peruntukan Kerajaan yang diberikan kepada Pulau Langkawi semenjak tahun 1987 sehingga sekarang.
35. PR-1333-L70677  
**Dr. Haji Izani bin Haji Husin [ Pengkalan Chepa ]** minta **PERDANA MENTERI** menyatakan berkenaan wang RM 2.6 billion yang dimasukkan ke akaun peribadi Perdana Menteri. Apakah hubungan Kerajaan Malaysia atau Perdana Menteri dengan penderma misteri 2.6 billion tersebut.
36. PR-1333-L71196  
**Tuan Mohd Rafizi bin Ramli [ Pandan ]** minta **MENTERI KEMAJUAN LUAR BANDAR DAN WILAYAH** menyatakan senaraikan semua pembelian aset di luar negara oleh MARA dengan perincian alamat aset, jumlah dibayar untuk membeli aset dan maklumat penjual aset kepada MARA.
37. PR-1333-L69756  
**Tuan Charles Anthony Santiago [ Klang ]** minta **MENTERI DALAM NEGERI** menyatakan menjelaskan sama ada Syarikat Real Time Networking Sdn. Bhd. telah diberi kontrak untuk membawa masuk 1,500,000 pekerja asing dari Bangladesh. Sudahkah analisa kos faedah dan analisa impak dijalankan ke atas pekerja-pekerja Malaysia sekiranya pekerja-pekerja ini dibawa masuk.

38. PR-1333-L71045  
**Tuan Su Keong Siong [ Ipoh Timor ]** minta **PERDANA MENTERI** menyatakan jumlah anggota-anggota keselamatan yang telah di kerahkan untuk untuk bertugas di perhimpunan “Baju Merah” pada 16 September 2015. Nyatakan sebab dan jumlah penglibatan bas-bas milik Kerajaan, agensi-agensi Kerajaan dan Anak-anak Syarikat Badan Berkanun yang digunakan untuk membawa peserta-peserta hadir di perhimpunan tersebut.
39. PR-1333-L70673  
**Tuan Tony Pua Kiam Wee [ Petaling Jaya Utara ]** minta **PERDANA MENTERI** menyatakan sebab Felda Global Venture Holdings akan meneruskan pembelian 37% Syarikat Eagle High Plantations dengan harga Rp775 setiap saham walaupun nilai pasaran adalah hanya sekitar Rp250 hari ini. Apakah sebabnya FGVH membayar wang deposit sebanyak 23% nilai pembelian sebelum perjanjian dimuktamadkan.
40. PR-1333-L70920  
**Puan Kasthuriraani a/p Patto [ Batu Kawan ]** minta **MENTERI DALAM NEGERI** menyatakan dengan terperinci:-
- (a) apakah jenis senapang Taser yang telah dibeli oleh Kerajaan Malaysia dan bilakah senapang tersebut dibeli; dan
  - (b) kos setiap senapang, syarikat pembekal serta tarikh penggunaan senapang Taser ini oleh pihak berkuasa.
41. PR-1333-L69604  
**Laksamana Pertama Mohamad Imran bin Abd Hamid (B) [ Lumut ]** minta **MENTERI KERJA RAYA** menyatakan sama ada wajar atau tidak diwujudkan Radio Trafik yang melaporkan situasi trafik di lebuh raya seluruh negara bagi membolehkan rakyat merancang perjalanan dan mengelak kesesakan khususnya di musim perayaan.
42. PR-1333-L70945  
**Dato' Abd. Aziz bin Haji Sheikh Fadzir [ Kulim Bandar Baharu ]** minta **MENTERI KEWANGAN** menyatakan reaksi Kerajaan dalam isu 1MDB yang telah menjadi perbualan di peringkat antarabangsa dan langkah yang diambil oleh Kerajaan dalam usaha menyampaikan maklumat sebenar mengenai 1MDB bukan sahaja kepada rakyat Malaysia malah kepada dunia keseluruhannya serta apakah isu 1MDB melanda negara ketika ini memberi kesan kepada kemasukan pelabur-pelabur asing ke negara kita.
43. PR-1333-L70755  
**Dato' Johari bin Abdul [ Sungai Petani ]** minta **PERDANA MENTERI** menyatakan :-
- (a) Perdana Menteri secara terbuka telah menyebut beliau menerima derma berjumlah RM2.6 bilion dari seorang Arab dari Timur Tengah; dan
  - (b) nyatakan siapa penderma ini. Apakah tujuan derma diberikan dan adakah apa-apa ikatan dan syarat yang dikenakan terhadap Perdana Menteri atau negara.

44. PR-1333-L70114  
**Tuan Haji Nasrudin bin Hassan [ Temerloh ]** minta **PERDANA MENTERI** menyatakan justifikasi sokongan yang telah diberikan kepada para peserta Himpunan Rakyat Bersatu pada 16 September lalu.
45. PR-1333-L70637  
**Datuk Haji Datu Nasrun bin Datu Mansur [ Silam ]** minta **MENTERI DALAM NEGERI** menyatakan melalui Ordinan Kelahiran dan Kematian 1951 (CAP.123) adakah Kementerian bercadang untuk mengubah mekanisme sedia ada terhadap kes-kes daftar lewat yang terpaksa melalui prosedur Mahkamah Majistret bagi permohonan kad pengenalan.
46. PR-1333-L71523  
**Puan Hajah Fuziah binti Salleh [ Kuantan ]** minta **MENTERI PERDAGANGAN DALAM NEGERI, KOPERASI DAN KEPENGGUNAAN** menyatakan sama ada Suruhanjaya Syarikat Malaysia (SSM) telah mengambil apa-apa tindakan terhadap mana-mana syarikat yang disyaki atau didakwa menjalankan kegiatan “gores dan menang”, dan nyatakan tindakan yang telah diambil secara terperinci, jika ada.
47. PR-1333-L71512  
**Tuan Sim Tong Him [ Kota Melaka ]** minta **MENTERI DALAM NEGERI** menyatakan tentang hasil siasatan kepada kedua-dua himpunan pada 29 dan 30 Ogos serta 16 September 2015 :-
- (a) jumlah anggota yang telah ditugaskan untuk kedua-dua himpunan ini dan jumlah perbelanjaan terlibat; dan
  - (b) berapa kes keganasan dan rusuhan telah dilaporkan. Adakah tangkapan telah dibuat dan juga dihadapkan ke mahkamah.
48. PR-1333-L70408  
**Puan Teresa Kok Suh Sim [ Seputeh ]** minta **MENTERI PENGANGKUTAN** menyatakan perbelanjaan yang digunakan oleh Kerajaan untuk mencari kapal terbang MH370 dan menangani nahas MH17. Nyatakan jumlah pampasan yang diberi kepada penumpang dan anggota kabin yang berkorban dalam kedua-dua nahas tersebut.
49. PR-1333-L71268  
**Datuk Wee Jeck Seng [ Tanjong Piai ]** minta **MENTERI KERJA RAYA** menyatakan apakah langkah tambahan yang diambil bagi memastikan keselamatan jalan raya di laluan sepanjang 2km dari Bandar Pekan Nanas ke Jalan Sawah di mana terdapat 2 buah sekolah menengah dan sebuah sekolah agama di laluan tersebut dan jalan berkenaan juga merupakan jalan alternatif ke lebuh raya PLUS.



50. PR-1333-L69499  
**Dato' Sri Haji Abdul Azeez bin Abdul Rahim [ Baling ]** minta **MENTERI BELIA DAN SUKAN** menyatakan apakah pelan pembangunan Kementerian bagi meningkatkan taraf kualiti sukan terutamanya di kawasan luar bandar di mana masih ramai anak-anak kampung amat dahagakan tempat untuk beriadah dan bersukan yang elok seperti padang bola, gelanggang futsal atau dewan badminton memandangkan masih banyak kampung-kampung di kawasan pedalaman tidak mempunyai padang bola atau gelanggang untuk bersukan.
51. PR-1333-L69640  
**Tuan Khoo Soo Seang [ Tebrau ]** minta **MENTERI PENDIDIKAN TINGGI** menyatakan apakah perincian "*Integrated Cumulative Grade Point Average*" (iCGPA) program percubaan yang telah dijalankan di lima buah universiti awam dan bagaimanakah iCGPA berupaya membentuk kualiti graduan yang tinggi serta memenuhi kehendak pasaran.
52. PR-1333-L70399  
**Tan Sri Dato' Seri Abd Khalid bin Ibrahim [ Bandar Tun Razak ]** minta **MENTERI TENAGA, TEKNOLOGI HIJAU DAN AIR** menyatakan rasional tidak mengambil tindakan di bawah Seksyen 114 AKta Perkhidmatan Industri Air 2006 terhadap Pengeluar Air Sungai Selangor (SPLASH), satu-satunya syarikat industri air Selangor yang masih enggan memuktamadkan segera penyusunan semula industri air Selangor malah tempoh rundingannya dilanjutkan setahun.
53. PR-1333-L70198  
**Datuk Joseph Salang anak Gandum [ Julau ]** minta **MENTERI KESIHATAN** menyatakan pendirian Kementerian berkenaan air alkali, misalnya Kangen Water yang sekarang membanjiri pasaran dan piawaian yang boleh diguna pakai.
54. PR-1333-L70469  
**Tuan Mohamed Hanipa bin Maidin [ Sepang ]** minta **PERDANA MENTERI** menyatakan :-
- (a) adakah pihak polis atau SPRM telah memanggil Perdana Menteri untuk disoal siasat di bawah seksyen 23(1) Akta Suruhanjaya Pencegahan Rasuah berhubung pendepositan RM2.6 bilion (USD700 juta) ke dalam akaun peribadi Perdana Menteri di CIMB bank; dan
  - (b) jika Perdana Menteri sudah dipanggil soal siasat, bilakah beliau dipanggil dan apakah status penyiasatan tersebut dan jika belum dipanggil, mengapakah Perdana Menteri tidak dipanggil untuk disoal siasat.

**ATURAN URUSAN MESYUARAT DAN USUL-USUL**

1. (D.R. 31/2015) Rang Undang-undang Perbekalan 2016 - **Menyambung semula Perbahasan atas masalah, “Bahawa Rang Undang-undang ini dibacakan kali yang kedua sekarang” (28 Oktober 2015)**

**[ Menteri Kewangan ]**

**DAN**

**Usul dibuat oleh YAB Menteri Kewangan dan masalah dicadangkan :-**

“Bahawa Dewan ini, mengikut subseksyen 4(3) Akta Kumpulan Wang Pembangunan 1966 [Akta 406], membuat ketetapan iaitu suatu jumlah wang sebanyak tidak lebih dari lima puluh dua bilion ringgit (RM52,000,000,000) dibelanjakan daripada Kumpulan Wang Pembangunan bagi tahun 2016, dan bagi tujuan dan butiran perbelanjaan pembangunan yang dinyatakan di bawah Maksud Pembangunan atau (“P”) dalam senarai Anggaran Perbelanjaan Persekutuan 2016, yang dibentangkan sebagai Kertas Perintah 42 Tahun 2015, adalah diuntukkan di bawah Maksud-maksud yang berkenaan jumlah-jumlah yang bersempena dengan butiran-butiran itu di ruangan enam dan tujuh senarai tersebut.”

**Menyambung semula Perbahasan atas masalah (28 Oktober, 2015)**

2. (D.R. 32/2015) Rang Undang-undang Kewangan 2015 **Bacaan Kali Yang Kedua**  
**[ Menteri Kewangan ]**
3. (D.R. 28/2015) Rang Undang-undang Perbadanan Insurans Deposit Malaysia (Pindaan) 2015 - **Menyambung semula Perbahasan atas masalah, “Bahawa Rang Undang-undang ini dibacakan kali yang kedua sekarang” (22 Oktober 2015)**  
**[ Menteri Kewangan ]**
4. (D.R. 30/2015) Rang Undang-undang Syarikat 2015 **Bacaan Kali Yang Kedua**  
**[ Menteri Perdagangan Dalam Negeri, Koperasi dan Kepenggunaan ]**

5. (D.R. 29/2015) Rang Undang-undang Skim Kepentingan 2015. “  
  
**[ Menteri Perdagangan Dalam Negeri,  
Koperasi dan Kepenggunaan ]**
6. (D.R. 9/2015) Rang Undang-undang Kanun Tatacara Jenayah (Pindaan) 2015 “  
  
**[ Menteri Dalam Negeri ]**
7. (D.R. 12/2015) Rang Undang-undang Keterangan (Pindaan) 2015 “  
  
**[ Menteri di Jabatan Perdana Menteri ]**
8. (D.R. 24/2014) Rang Undang-undang Dadah Berbahaya (Pindaan) (No. 2) 2014 “  
  
**[ Menteri Kesihatan ]**

9. PR-1333-U69963  
**Datuk Dr. Makin @ Marcus Mojigoh [ Putatan ]** akan mencadangkan:-

“Bahawa Dewan ini mengambil maklum bahawa sejak akhir-akhir ini, dan Gerakan Sabah-Sarawak keluar Malaysia (SSKM) kian mendapat perhatian dan sokongan dari sebilangan kecil rakyat dari kedua-dua negeri ini. Bahawa Dewan ini mengambil maklum bahawa, terdapat rungutan-rungutan di kalangan rakyat negeri Sabah dan Sarawak dalam beberapa isu yang mereka fikirkan bahawa hak mereka, seperti yang dijanjikan dan terkandung dalam Perjanjian Malaysia 1963 telah dicabuli atau tidak ditunaikan. Dan mengambil maklum juga, antara isu utama yang disuarakan dalam rungutan ini adalah kebanjiran pendatang asing ke negeri Sabah dan di tambah buruk pula dengan pemberian status warga Negara kepada mereka ini. Dan mengambil maklum juga bahawa, setiap kali isu 20 perkara (bagi Negeri Sabah) dan 16 perkara (bagi Negeri Sarawak) dalam Perjanjian Malaysia ini disuarakan, terdapat usaha-usaha pihak tertentu untuk mensenyapkan isu ini dan akhirnya rungutan-rungutan ini menjadi satu gerakan ketidakpuasan hati rakyat. Dan mengambil maklum juga bahawa, gerakan ketidakpuasan hati rakyat ini telah sampai satu tahap di mana mereka secara terbuka mengelarkan diri mereka sebagai aktivis Sabah-Sarawak keluar Malaysia atau ringkasnya SSKM. Dalam hal ini, Kerajaan hendaklah memandang serius akan kesan dan implikasi perpaduan rakyat serta ketenteraman negara pada keseluruhannya. Kita maklum bahawa, mengambil tindakan Undang-undang semata-mata untuk menghalang mereka ini bagi menyuarakan rungutan mereka ini tidak akan menyelesaikan isu yang ditimbulkan, malah akan merumitkan keadaan lagi di mana mereka akan semakin mendapat simpati daripada kalangan rakyat yang lainnya sementara Kerajaan pula dianggap sebagai tidak perihatin dan kuku besi.

Maka, bagi menangani masalah isu ini, Dewan ini hendaklah mengambil ketetapan bahawa Kerajaan hendaklah merangka satu gerak kerja untuk menangani isu ini secara Holistik termasuklah menjemput dan mendengar rungutan mereka yang menggelarkan diri mereka sebagai SSKM ini."

**[ Menteri Dalam Negeri ]**

10. PR-1333-U69964

**Datuk Dr. Makin @ Marcus Mojigoh [ Putatan ]** akan mencadangkan:-

"Bahawa Dewan ini mengambil maklum bahawa, terdapat rungutan-rungutan dikalangan rakyat bahawa sejak akhir-akhir ini, perpaduan, keharmonian, kesejahteraan dan kerjasama antara rakyat negara ini yang terdiri dari berbilang kaum dan agama telah terhakis. Dan mengambil maklum juga, antara isu utama menyebabkan perkara ini berlaku kerana terdapat golongan tertentu yang memainkan isu bangsa dan agama sewenang-wenangnya serta rakyat merasakan tidak ada tindakan tegas yang diambil bagi menangani masalah ini. Dan mengambil maklum juga bahawa, Perhimpunan Bersih 4 dan Perhimpunan Rakyat Bersatu baru-baru ini telah menanamkan bibit kebencian serta syak wasangka antara kaum di negara ini. Dan mengambil maklum juga bahawa, Rukun Negara sebagai tonggak perpaduan, keharmonian, kesejahteraan dan kerjasama antara rakyat negara ini secara tidak langsung tidak lagi dihormati dan dipatuhi. Dalam hal ini, Kerajaan hendaklah memandang serius akan kesan dan implikasi perpaduan rakyat serta ketenteraman negara pada keseluruhannya. Maka, bagi menangani masalah isu ini, Dewan ini hendaklah mengambil ketetapan bahawa Kerajaan hendaklah merangka satu gerak kerja untuk menangani isu ini secara Holistik termasuklah menjemput dan mendengar rungutan mereka ini. Kerajaan juga hendaklah menguatkuasakan segala peruntukan Undang-undang yang ada bagi menghalang mana-mana demokrasi atau perjumpaan umum yang membangkitkan isu bangsa dan agama, yang boleh menggugat perpaduan, keharmonian, kesejahteraan dan kerjasama antara rakyat negara ini."

**[ Perdana Menteri ]**

11. PR-1333-U69965

**Datuk Dr. Makin @ Marcus Mojigoh [ Putatan ]** akan mencadangkan:-

"Bahawa Dewan ini mengambil maklum bahawa, terdapat laporan mengatakan bahawa operasi bot lautan dalam yang beroperasi di negara ini tidak mendatangkan faedah kepada negara ini secara total. Dan mengambil maklum juga, antara isu utama yang disuarakan dalam laporan ini adalah, para pengusaha bot lautan dalam ini menjual minyak diesel bersubsidi kepada bot-bot asing. Dan mengambil maklum bahawa, terdapat juga laporan bahawa tangkapan bot lautan dalam ini dijual kepada nelayan asing yang menawarkan harga yang lebih baik. Dan mengambil maklum juga bahawa, kedua-dua aktiviti yang disebutkan ini telah mendatangkan kerugian yang besar kepada negara ini, sama ada dari segi subsidi diesel mahupun dari segi tangkapan hasil lautan di negara ini dijual ke negara asing.

Maka, bagi menangani masalah isu ini, Dewan ini hendaklah mengambil ketetapan bahawa Kerajaan hendaklah merangka satu sistem kawalan yang bersepadu bagi memastikan bahawa semua diesel bersubsidi digunakan dengan niat asal serta tangkapan tersebut hendaklah dipasarkan di negara ini.”

**[ Menteri Pertanian dan Industri Asas Tani ]**

12. PR-1333-U69966

**Datuk Dr. Makin @ Marcus Mojigoh [ Putatan ]** akan mencadangkan:-

“Bahawa Dewan ini mengambil maklum bahawa, isu 1MDB telah mencemarkan nama baik Kerajaan dan Negara Malaysia pada umumnya. Dan mengambil maklum juga, isu 1MDB telah sedikit sebanyak menghakis kepercayaan pelabur asing kepada Sistem Pelaburan di Negara ini. Dan mengambil maklum juga bahawa, isu 1MDB telah disensasikan melalui media sosial, media elektronik dan media asing dengan sewenang-wenangnya yang menggambarkan bahawa syarikat milik Kerajaan ini hampir muflis dan liabilitinya perlu ditanggung oleh Kerajaan. Dan mengambil maklum juga bahawa, hasil daripada kemuskilan ini, rakyat pada umumnya mempersoalkan cara kerja Kerajaan mentadbir 1MDB sehingga mengalami kerugian yang besar dan terpaksa menanggung liability 1MDB. Maka, bagi menangani masalah ini, Dewan Yang Mulia ini hendaklah mengambil ketetapan bahawa, Kerajaan hendaklah memperjelaskan secara terperinci mengenai model perniagaan 1MDB kepada umum agar satu gambaran yang telus dapat mereka perolehi serta mengembalikan kebolehppercayaan rakyat kepada Kerajaan masa kini.”

**[ Menteri Kewangan ]**

13. PR-1333-U70485

**Tuan Ng Wei Aik [ Tanjong ]** akan mencadangkan:-

“Bahawa Dewan Rakyat ini mengambil ketetapan untuk mengutuk Perhimpunan Rakyat Bersatu yang diadakan pada 16 September 2015 yang sifatnya berbaur perkauman serta bertujuan mengapi-apikan sentimen perkauman, termasuk menuntut supaya sekolah-sekolah Cina ditutup, menggelar anggota-anggota polis yang bertugas sebagai “barua Cina”, cuba menimbulkan kekecohan di Jalan Petaling serta mempersoalkan keperluan “Little India” diwujudkan dan tindakan-tindakan yang sewajarnya harus diambil terhadap pihak penganjur dan pihak-pihak yang harus bertanggungjawab.”

**[ Menteri Dalam Negeri ]**

14. PR-1333-U70272

**Tuan M. Kulasegaran [ Ipoh Barat ]** akan mencadangkan:-

“Bahawa Dewan ini mengambil maklum demi kepentingan negara dan masyarakat sejagat pandangan serius terhadap kestabilan ekonomi dan kemajuan negara harus diberi perhatian sepenuhnya. Oleh yang demikian Dewan ini perlu mengambil maklum mengenai perkara ini dan mengarahkan Kerajaan untuk mengatasi masalah ini.”

**[ Perdana Menteri ]**

15. PR-1333-U70255

**Dr. Tan Seng Giaw [ Kepong ]** akan mencadangkan:-

“Bahawa Menteri Kewangan membincangkan cara-cara yang diambil untuk mempertahankan nilai ringgit.”

**[ Menteri Kewangan ]**

16. PR-1333-U70256

**Dr. Tan Seng Giaw [ Kepong ]** akan mencadangkan:-

“Bahawa Menteri Sumber Asli dan Alam Sekitar mendebatkan masalah jerebu di rantau in.”

**[ Menteri Sumber Asli dan Alam Sekitar ]**

17. PR-1333-U71552

**Tuan Fong Kui Lun [ Bukit Bintang ]** akan mencadangkan:-

“Bahawa Kerajaan mempergiatkan usaha untuk menyatu padukan rakyat berbilang kaum di Malaysia yang kelihatan masih lemah dan longgar meskipun negara telah menjadi negara merdeka dan berdaulat sejak 58 tahun lalu supaya mereka boleh hidup dengan aman dan saling memerlukan dan memahami bagi memudahkan mereka membangunkan ekonomi negara secara bersama dan merealisasikan impian Malaysia.”

**[ Perdana Menteri ]**

18. PR-1333-U71553

**Tuan Fong Kui Lun [ Bukit Bintang ]** akan mencadangkan:-

“Bahawa Kerajaan memulihkan pilihan raya Kerajaan Tempatan seluruh negara supaya urus tadbir Kerajaan menjadi cekap, akauntabiliti dan bersih dengan mengambil langkah pertama untuk membuat kajian serius dan melakukan pungutan suara antara rakyat.”

**[ Menteri Kesejahteraan Bandar, Perumahan dan Kerajaan Tempatan ]**

19. PR-1333-U69805

**Dato' Kamarudin bin Jaffar [ Tumpat ]** akan mencadangkan:-

“Bahawa Dewan ini memutuskan untuk Malaysia menerima masuk, memberi perlindungan dan akhirnya memberikan taraf kewarganegaraan kepada 1000,000 orang rakyat negara Syria daripada jutaan orang yang sekarang menjadi pelarian di Turki dan Eropah.”

**[ Perdana Menteri ]**

20. PR-1333-U69806

**Dato' Kamarudin bin Jaffar [ Tumpat ]** akan mencadangkan:-

“Bahawa Dewan ini merakamkan perasaan sedih dan kecewa bahawa perjalanan kerja-kerja Jawatankuasa Kira-kira Wang Negara (PAC) telah tergendala oleh beberapa sebab dan dengan ini memutuskan untuk meminta Tuan Yang di Pertua Dewan Rakyat dengan segera melicinkan semula perjalanan Jawatankuasa itu.”

**[ Perdana Menteri ]**

21. PR-1333-U69807

**Dato' Kamarudin bin Jaffar [ Tumpat ]** akan mencadangkan:-

“Bahawa Dewan ini amat tidak berpuas hati dengan kemajuan pembinaan rumah-rumah untuk mangsa banjir negeri Kelantan. Oleh itu Dewan ini mendesak Kerajaan Pusat berusaha dengan lebih gigih lagi bersama dengan Kerajaan Negeri Kelantan untuk melipatkali ganda usaha pembinaan rumah-rumah tersebut.”

**[ Perdana Menteri ]**

22. PR-1333-U70769

**Dato' Johari bin Abdul [ Sungai Petani ]** akan mencadangkan:-

“Bahawa Dewan ini mengambil maklum, hubungan antara kaum mutakhir ini makin meruncing dan jika tidak dibendung akan mencapai tahap amat merbahaya dan akibatnya negara akan hancur seperti yang terjadi di negara-negara lain yang sedang bergolak akibat isu perkauman. Bila rakyat Malaysia berbangsa Dayak, Kadazan, Orang Asal, Cina , Melayu, Jawa, Bugis atau apa suku kaum sekalipun mengkritik dan mempersoalkan hal tatakelola Negara dan kepimpinan Perdana Menteri dan Kabinetnya, rakyat tidak mempersoalkan ras Perdana Menteri. Rakyat mempersoal Perdana Menteri atas kapasiti beliau sebagai Ketua Eksekutif Negara.BERSIH 4.0 menganjurkan demo jalanan kerana mendesak Perdana Menteri memberi jawapan kepada banyak persoalan yang tidak terjawab.

Soal 1MDB, Derma RM 2.6 bilion, Pertukaran Pegawai-pegawai SPRM, Penamatan khidmat Tan Sri Gani Patail sebagai Pendakwa Raya, pembebasan Abdul Razak Baginda yang rapat dengan Perdana Menteri dalam kes pembunuhan Altantuya Shaaribuu yang amat memalukan negara dan banyak lagi isu yang amat-amat mendesak yang tidak dijawab oleh Perdana Menteri secara meyakinkan. Untuk itu Kerajaan mesti membezakan mengkritik Perdana Menteri bukan mengkritik bangsa Perdana Menteri tetapi kerana Perdana Menteri adalah Ketua Eksekutif Negara yang sememangnya boleh dikritik yang dibenarkan oleh sistem pemerintahan yang diamalkan di negara ini.”

**[ Perdana Menteri ]**

23. PR-1333-U70770

**Dato' Johari bin Abdul [ Sungai Petani ]** akan mencadangkan:-

“Bahawa Dewan ini mengambil maklum, bila UMNO dan NGO yang menyokong UMNO menganjurkan demo jalanan bertemakan Himpunan Maruah Melayu pada 16 September 2015 yang kemarahan disasarkan kepada rakyat kaum Cina, yang dikatakan mendominasi Himpunan BERSIH 4.0 pada 29 dan 30 Ogos 2015, penganjur memilih kaum Cina sebagai fokus serangan. Penganjur membawa posters dan banners tertulis kata-kata provokasi dan perkauman yang amat merbahaya seperti “Ini Tanah Melayu, Cina boleh keluar”. “Bawa parang dan keris. Tetak Cina. Umno perlukan anda”. Sedangkan yang keluar dijalanan pada 29 dan 30 Ogos 2015 rakyat dari berbagai kaum termasuk Melayu dan Bumiputra yang lain. Kaum lain selain Cina juga menyuarakan perasaan tidak puas hati mereka terhadap Perdana Menteri. Di mana yang dikatakan Cina menghina Melayu dan Maruah Melayu dicabar. Kerajaan mesti berjiwa besar. Walaupun Kerajaan Barisan Nasional diterajui oleh UMNO dan Melayu tetapi rakyat negara ini terdiri dari berbagai bangsa yang wajib dilindungi dan dihormati.”

**[ Perdana Menteri ]**

24. PR-1333-U70772

**Dato' Johari bin Abdul [ Sungai Petani ]** akan mencadangkan:-

“Bahawa Dewan ini mengambil maklum, penyakit Denggi akibat jangkitan nyamuk di Malaysia telah mencapai satu tahap yang merbahaya. Lebih parah kematian akibat penyakit ini sudah diterima sebagai satu yang lumrah dan tidak ada rasa bersalah oleh pemerintah. Kerajaan sepatutnya menubuhkan satu institusi khas bagi melawan wabak ini dengan memberikan peruntukan kewangan yang secukupnya serta membekalkan berbagai pakar bagi menjadikan institusi ini betul-betul memberi tumpukan dan perhatian kepada masalah yang begitu lama tidak dapat diselesaikan. Malaysia mesti memainkan peranan utama dan boleh menjadi juara dalam memerangi penyakit ini bukan sahaja di rantau ini malah di dunia. Kerajaan mesti serius dan komited dalam hal ini.”

**[ Menteri Kesihatan ]**



25. PR-1333-U70774

**Dato' Johari bin Abdul [ Sungai Petani ]** akan mencadangkan:-

“Bahawa Dewan ini mengambil maklum, Kementerian Belia dan Sukan banyak memberi tumpuan kepada pembangunan sukan tetapi meninggalkan pembangunan belia di belakang. Setiap tahun ribuan anak-anak Malaysia yang keluar dari sekolah dan ramai yang tidak melanjutkan pelajaran ke pengajian tinggi atas berbagai sebab dan alasan. Akibat tidak ada program wajib yang mesti diikuti dan disertai oleh mereka, mereka menjadi satu eset yang amat bernilai yang terbiar dan tidak dimanfaatkan sepenuhnya. Adalah dicadangkan anak-anak ini, didaftarkan dan diwajibkan menyertai Khidmat negara selama dua tahun seperti yang dilakukan dikebanyakkan negara. Semasa dalam program ini, pilih dua atau tiga bidang ilmu yang boleh memberi menafaat berterusan bila mereka tamat program nanti. Sebagai contoh, ilmu motor mekanik dan elektrik. Selepas dua tahun mereka boleh berdikari dan bantuan susulan boleh diusahakan. Untuk memastikan program ini berjaya ianya mesti dilaksanakan sebagai program wajib dan dikembangkan dengan elemen ketenteraan.”

**[ Menteri Belia dan Sukan ]**

26. PR-1333-U70776

**Dato' Johari bin Abdul [ Sungai Petani ]** akan mencadangkan:-

“Bahawa Dewan ini mengambil maklum, kegiatan merempit oleh anak-anak muda khasnya anak Melayu amat memalukan bangsa dan Kerajaan. Kerajaan seolah-oleh tidak ada jawapan pada permasalahan ini. Mereka yang merempit bukan sahaja membahayakan nyawa mereka juga nyawa orang awam. Adalah dicadangkan pihak polis menggunakan anggota Cawangan Khas bagi meninjau dan kenal pasti ketua kumpulan ini dan menahan mereka atas undang-undang yang sedia ada. Penahanan mereka hendaklah dihebahkan dalam akhbar dan media elektronik. Menahan mereka untuk beberapa malam di lokap dan jika ada bukti yang cukup mendakwa mereka di mahkamah akan menghantar mesej yang jelas bahawa kegiatan mereka amat merbahaya dan amat dibenci oleh masyarakat. Ini mesti dilakukan secara konsisten bukan berkala.”

**[ Menteri Dalam Negeri ]**

27. PR-1333-U71195

**Tuan Hee Loy Sian [ Petaling Jaya Selatan ]** akan mencadangkan:-

“Bahawa Dewan ini mengemukakan Undi Tidak Percaya terhadap Perdana Menteri Datuk Seri Najib Tun Razak atas alasan penerimaan “Wang Derma” berjumlah RM2.6 billion yang pada mulanya dinafikan, kemudiannya mengugut untuk menyaman akhbar Wall Street Journal dan akhirnya mengakui wang tersebut diperolehi daripada individu yang berasal dari Timur Tengah.

Dengan tidak menjelaskan mengapa “Wang Derma” ini dimasukkan ke akaun peribadi dan bukan atas nama parti, Dewan juga tidak berpuas hati ke atas siasatan skandal 1MDB yang berlaku di mana “Special Task Force” yang sepatutnya menyiasat skandal ini dibubarkan tanpa memberi sebarang alasan sehingga Peguam Negara Tan Sri Abdul Gani Patail ditamatkan perkhidmatan, pegawai SPRM dipindahkan, pihak polis mengganggu siasatan SPRM dan Bank Negara, Public Account Committee (PAC) yang sedang menjalankan siasatan terhadap kes 1MDB tidak berfungsi akibat daripada empat anggota PAC yang terbabit telah dilantik menjadi Menteri atau Timbalan Menteri oleh Perdana Menteri, Pengarah Cawangan Khas (SB) diberhentikan, Timbalan Pengarah Cawangan Khas dipindahkan ke Jabatan Perdana Menteri tanpa diberi tugasan. Disebabkan masalah yang dinyatakan, Perdana Menteri Datuk Seri Najib Tun Razak telah menjejaskan imej Negara di dunia dan menyebabkan pelabur tidak yakin terhadap Kerajaan sekarang sehingga ekonomi menjadi tidak stabil, serta pasaran saham menjunam teruk dan kejatuhan nilai wang ringgit Malaysia berbanding dengan dolar Amerika Syarikat. Maka rakyat Malaysia tidak lagi percaya terhadap Perdana Menteri dan dengan ini Dewan hendaklah mengambil ketetapan untuk mengemukakan Undi Tidak Percaya terhadap Perdana Menteri.”

**[ Perdana Menteri ]**

28. PR-1333-U70806

**Tuan Manivanan a/l Gowindasamy [ Kapar ]** akan mencadangkan:-

“Bahawa Dewan ini mempertimbangkan cadangan untuk menghalang dan mengharamkan penjualan arak murahan (cheap liquor) secara mudah dan murah yang semakin berleluasa. Gegaja pengambilan arak murahan ini menimbulkan pelbagai masalah sosial seperti keganasan rumah tangga dan gengsterisme serta merosakkan organ dalaman. Di samping itu, kawalan dan penyeliaan terhadap kedai-kedai menjual arak perlu dketatkan. Masa penjualan arak dan lokasi minum arak perlu dikaji. Kawasan tempat awam seperti di taman awam dan taman permainan kanak-kanak, minum arak wajib diharamkan. Dewan ini juga wajib mempertimbangkan penubuhan Pusat Pemulihan Arak (PPA) di setiap negeri di Malaysia untuk membendung masalah minum arak yang semakin berleluasa di kalangan anak muda merentasi sempadan bangsa dan agama.”

**[ Menteri Kesejahteraan Bandar, Perumahan dan Kerajaan Tempatan ]**

29. PR-1333-U70808

**Tuan Manivanan a/l Gowindasamy [ Kapar ]** akan mencadangkan:-

“Bahawa Dewan ini mempertimbangkan cadangan untuk kes kematian di bawah tahanan Polis DiRaja Malaysia, keluarga si mati diberi kebenaran sepenuhnya untuk memperoleh Pakar Perubatan Forensik sendiri bagi mewakili pihak keluarga si mati semasa bedah siasat dijalankan.”

**[ Menteri Dalam Negeri ]**

30. PR-1333-U70809

**Tuan Manivanan a/l Gowindasamy [ Kapar ]** akan mencadangkan:-

“Bahawa Dewan ini mendesak agar pendidikan agama diperkenalkan di sekolah kepada pelajar bukan Islam sebagai langkah untuk menerapkan nilai-nilai murni dan keagamaan di kalangan pelajar bukan Islam bagi menangani gejala sosial yang kian meningkat dan berleluasa akibat daripada kegagalan sistem pendidikan di Malaysia.”

**[ Menteri Pendidikan ]**